

Basho ngazwi lanye kwibrics

KHETHA SANGWENI

ZIGCIZELELE ukubambisana phakathi kobuholi bendabuko nohulumeni izithunywa ezahlukene eziqhamuka emazweni omhlaba angaphansi kweqoqo elaziwa ngeBRICS elihlanganisa iBrazil, Russia, India, China neNingizimu Afrika.

Lezi zithunywa eziyizifundiswa bezikhuluma zishiyelana inkundla engqungquetheleni yokucobelelana ngolwazi yezinsuku ezimbili ehlelwe yi-University of KwaZulu Natal (UKZN) ebisenkundleni iMoses Mabhida izolo.

USolwazi Renu Modi onguMqondisi weCentre for African Studies e-India, uthe kubalulekile ukuthi abakudingidayo kufakwe ezinhlelweni zikahulumeni.

“Lokhu esikuxoxayo sifuna kwesekwe ngohulumeni bamazwe ethu, kufanele kukhulunywe ngakho engqungquetheleni yeBRICS elandelayo,” kusho uModi.

Ngakolunye uhlangothi iNkosi Themba Mavundla oyilungu lenhlangano yabaholi bendabuko, ithe isiko lobuntu libalulekile ukuze kuyiwe phambili.

“Thina singama-Afrika sazi ukuthi umuntu ungumuntu ngabantu, sigqugquzelu ukubambisana,” kusho uMavundla obekhuluma esikhundleni senkosi uPhathisizwe Chiliza onguSihlalo weNdlu yoBuholi boMdabu ongaphumelelanga.

UMavundla uncome nohlelo lukahulumeni waKwaZulu-Natal, i-Operation Sukuma Sakhe wathi lusabalele kakhulu luvula amathuba okusebenzisana namanye amazwe.

Uqhubelele wathi umoya wobuntu ungasiza ekutheni umphakathi ukwazi ukubeka uvo lwawo ukuze kunqandwe amaphutha enziwa ngamazwe eBRICS.

Ngesikhathi sekuvulwa ithuba lemibuzo, abelaphi bendabuko abebekhona baveze ukuthi banokwesaba ukuveza ulwazi lwabo ngoba luthathwa lusetshenziswe bona basale bencela izithupha. Izithunywa zibe seziqinisekisa ukuthi kuzoghanyukwa nezindlela zokuvikela ulwazi lwabo ukuze bangapheli amandla. Bekukhona nezikhulu eziphuma emazweni angaphansi kweBRICS.